



Venezuela-i opposition lenir Guanipa tanaben apu

Asian C'ships: Manu aser Esha nati silver aser bronze medal angu

VOL. XXIII ISSUE NO. 118 (ADOK 118) DIMAPUR SANGTENNÜ (TUESDAY) TSÜKLA (FEBRUARY) 10, 2026 ₹ 5.00

Ukhrul nung security akangshiogo; bushisüngdang

Imphal, February 9, 2026 (Agencies): Ukhrul district nung mi amshia amakba aser kin o kin tsüngda mepetmesü adokba tuluba küma meyoktsü atema Manipur sorkari Hombarnü damage control measures tenzükogo.

Manipur sorkari additional security forces yok, police-i asüngdangya tenzük aser technology amshia özüng alema inyakertem maitsü jangjatsü tenzükogo.

Litan village nung ki 24 tashi rongdoktsü aser iba nungi ki 21 Tangkhul Naga nung aser ki 3 Kuki nung meyong ta jangjaogo. Maneni, Public Works Department office ka dena sorkar kiojen nunga mi senoktsü.

Hombarnü Deputy Chief Minister Losii Dikho-i lendong atalokba tesemtem sema senzü aser tensa asadangogo. Paisa kin ana nungi teshimet nübötem den yimjung senden ka ayonga amen.

Tang tashi nung nisung shinga pua maru lir saka aibelenertem aputsü ta Losii Dikho-i ashi.

Senden kanga junga menogo aser telok anaprongi yimjung aginüba shiogo. State aser central sorkartem den security forces

ajanga tekaratiba nung tensa süngjemtsü asoshi meranga inyakdar ta paisa metetdaksü.

Tanü Losii Dikho den Ukhrul MLA Ram Muivah aser Saikul MLA Kimneo Hangshing Haokip nungeri Litan Sareikhang semdanga liasü.

Kin ana tsüngda mepetmesü adoka raraba sülen state sorkari tensa kanga junga reprangdar ta Cabinet Minister Konhoujam Govindas-ia BJP Imphal office nung osangbener dang ashi.

"Manipur nung küm aika kin temeyoktep yimjung nung liyonga aruba putiotsü lir. State renloktsü atema yimjung aser nübortem putepa alitsü kanga tongtipang, ibaji rara anen nung dang ataloktsü" ta pai ashi.

Tanü Manipur Chief Minister Yumnam Khemchand Singh-ia Ukhrul district semdangogo.

CM Yumnam Khemchand Singh-i Regional Institute of Medical Sciences nung yirua alisang den ajurutepa osang metetpela.

"Ni nisung ajak dang yimjung nung aser putepa alitsü ayongzüker. Tensa tamajungba küma maotsü atema olemtep aser aremzüktep nüngdaker" ta CM Singh-i metetdaksü.

FNTA ajanga Eastern Nagaland kanga ajangzüktsü: Kirti Vardhan Singh



Kohima, February 9, 2026 (TYO): Frontier Nagaland Territorial Authority (FNTA) agreement sign asüba ajanga Eastern Nagaland nung yimjung, tashi aser terenlok alitsü ta Union Minister of State for Forest, Environment & Climate Change Kirtivardhan Singh-ia ashi.

Kirti Vardhan Singh ya Honibar nungi Nagaland nung arua amunger aser tanü pai Kohima nung BJP Head Office nung osangbener den jembi.

Union Home Minister Amit Shah aser Chief Minister Neiphiu Rio na lia February 5 nü Ministry of Home Affairs, Nagaland State sorkar aser Eastern Nagaland People's Organisation (ENPO) tsüngda agreement nung sign asüba ajanga eastern district trok nung terenlok mapa tekaraba aser tajungba inyaktsü ta Singh-ia ashi.

Subjects 46 den administrative autonomy dena FNTA agütsüogo, secretariat balaka amenoktsü aser Centre nungi annual budget balaka lemozüktsü ta pai ashi.

Iba agreement ajanga yimjung alitsü aser tensa tajungba akümtsü aser Eastern Nagaland nung infrastructure development, investment, tourism, aser employment generation atema mapang tajung bentsür arutsü ta Singh-ia ashi.

FNTA framework ajanga Centre-i North-East asoshi

bilemtsüba sayur. 2019 nungi Centre-i northeast nung peace aser development agreements 40 tema sign sütepogo ta paisa metetdaksü.

"Yimjung aser terenlok külemi aoer. Tensa süngjema kümra, nisungtemi liyonga aotsü aser entrepreneurship nung temulung agütsütsü" ta Singh-ia ashi.

2047 tashi nung linük renloktsüba mangdang nung Nagaland aser North-East tongtipang lir. Prime Minister Narendra Modi-i North East asoshi temulung kanga agütsür aser mapa mapang shia sensaksemba den minister tem yoker. India renlokba otsü nung North East ya tongtipang shilem ka lir ta paisa ashi.

Dimapur Airport ulushitsü atema mapang talangka mebanteti aruba tebilemtsü atema inyaktsü ta Kirti Vardhan Singh-ia nangzük.

"Assam Rifles training centre indang ali ya Airport Authority of India aser Ministry of Home Affairs meyong lir" ta Tourism & Higher Education Minister Temjen Imna Along-i ashi.

State sorkari Assam Rifles training centre belentsü asoshi tanga ali agütsüogo aser Centre-i tarutsü nung international flights senzütetsüsa airport ulushitsü meranger ta pai ashi.

Union Budget 2026-27 ajanga lanurtem, mapa adoktsüba aser entrepreneurship nung temulung

agütsür. India-i linük 40 tema den Free Trade Agreements agiogo aser Indian goods and services atema markets tasen lapoker ta Union MoS Kirti Vardhan Singh-i osangbener dang ashi.

Item agreements nung Migration aser Mobility provisions dena lir aser iba ajanga skilled Indian lanurtemi bendanglen healthcare, construction, services, aser manufacturing maparen inyaktsütsü. Iba ajanga Nagaland ama state tilatem asoshi maongka tasentem agütsür ta paisa ashi.

"Union budget nung enoka aliba maparen aika nungi Nagaland tajangzük angutsü. Budget nung eco-tourism aser rural livelihoods atema enokba den sustainable mountain trails, forest trails, bird-watching circuits, aser homestay-based tourism indang schemes lir" ta Singh-ia metetdaksü.

North East nung Buddhist circuit ka yanglutsü enoksema lir aser iba ajanga mapa anguba den cultural tourism ajungkettsü ta paisa shisem.

Sorkari digital platforms ajanga Tetsürtemi Self-Help Groups yaritsü aser market linkages indangindanga yanglutsütsü ta Singh-ia ashi.

FNTA agreement den economic aser infrastructure initiatives ajanga Nagaland aser North-East kanga kara renloka aotsü ta Union MoS Singh-ia ashi.

Paiwang-i Union minister Nadda den ajurutep



Minister P. Paiwang Konyak aser Union Minister H&FW J.P. Nadda na ajurutepdang agiba noksa ka angur.

Dimapur, February 9, 2026 (TYO): Health & Family Welfare Minister P. Paiwang Konyak-i February 9, 2026 nü Union Minister for Health & Family Welfare J. P. Nadda den ajurutepogo.

Union Minister Nadda-i Nagaland nung eastern region renloktsü atema tenangzükba yur yaria aruba aser talisa Frontier Nagaland Territorial Authority (FNTA) atema Memorandum of Agreement sign asüba atema Paiwang Konyak-i pelaba metetdaksü.

Senden nung Paiwang-i Union Minister den State Programme Implementation Plan (SPIP) kübok infrastructure

development maparen inyaka aruba osang lemsatp.

Paisa Resource Envelope teimba akümba aser Nagaland Institute of Medical Sciences & Research (NIMSR) aser Mon Medical College indang osang lemsatp.

Union Minister Nadda-i central level nung Nagaland nungi kaketshirtem asoshi MBBS seats teimba kümtsüba atema Minister Paiwang-isa pelaba shisem.

Tenati PM-ABHIM, 15th Finance Commission grants aser National Health Mission (NHM) Resource Envelope tekaraba nung amshitsü onüktem benoka jembitp.

Nagaland-i bendanger aruba ghonda 24 tsüngda ashitsüla

Dimapur, February 9, 2026 (TYO): Dimapur police commissionerate-i hotels, homestays, hospitals, educational institutions aser tangartem dena accommodation providers ajak dang bendangertem aruba ghonda 24 tsüngda osang sangoktsütsü tetuyuba agütsüogo.

"Immigration and Foreigners Act, 2025 kübok iba tetuyuba sülen manidakertem temerenshi alitsü. Ano, osang agütsütsü menuba, bendanger kar tenüng meinoksemba mesüra osang tejangja magütsüba atemaa temerenshi alitsü" ta Dimapur Police Commissioner-cum-

Foreigners Registration Officer Aotula T. Imchen-i sangdong ka nung ashi.

Immigration and Foreigners Act, 2025 den rules ya September 1, 2025 nungi mapa küma tenzükogo aser iba ajanga India nung bendangertem entry, stay aser registration indang özüngtem agütsür ta sangdong nungsa shiogo.

Iba özüng tasen kübok hotels, guest houses, hostels, rented premises, homestays, religious and charitable institutions, hospitals, aser tents o sarais nung dena accommodation keepers-i bendangertem aliba

osang sangoktsütsü lateta lir.

Bendanger kaketshirtem azüngtsü aniokba shisaliok rejutem aser ano bendangertem anenzükba mesüra shiranger yariba medical establishments ajaki osang agütsütsüla.

Iba Act ajanga Overseas Citizens of India (OCI) dena foreigner shia aruba aser aoba personal details agütsütsü tuyur.

Iba osang ya küm ka atema electronically ayutsüla aser registration officers, district authorities, mesüra police ketdangsürtemi meshidang agütsütsüla ta Act nungsa lateta lir.

Kohima nung tesayur atema Music Education training tenzükogo



Anogo asem tesayur nem Music Education training agütsüba sentong February 9, 2026 nü Morung Hall, Directorate of School Education, Kohima nung tenzükodang tangokba noksa ka nung Director, DoSE, Razouseyi Vese, ketdangsürtem, shilem agirtem aser Yamaha Corporation ketdangsürtem angur.

Dimapur, Tsüklai/February 09 (TYO): Samagra Shiksha kübok Yamaha Music India den lungjemer tesayur nem Music Education nung asemnü training sentong ka February 9, 2026 nü Morung Hall, Directorate of School Education, Kohima nung tenzükogo.

Director, School Education, Razouseyi Vese-i iba sentong nung jembidang, ibai Japan den partnership mezüngbuba alitsü ta ashi. Pai World War II mapang nungi linük ana tsüingta tesendaktep tajung nung lia aruba indang lemsatepa liasü. Iba tesendaktep ya music education ajanga tashi taitba kumogo ta pai ashi.

Vese-i tesayurtem dang iba maongka agia kaketshirtem sorkar mapa kisüing nung metaloka aliba alema oa lenmang sayutsü ajungshia liasü.

Kaketshirtem asoshi music yagi tarutsü nung maongka tajungba agütsütsü ta ashi aser music education nung tanur terenlok atema yaritepa külemi inyaksü ta metetdaksü.

Yamaha Music India tenüing nung Ryoji Maruyama, Sales Unit Head, Yamaha Music India ajanga jembidang, ken ajanga nüburtem anisüingzüka aser pela aliba nung shilem agitsü aser India tesem balala nung quality music education agütsütsü mangdang nung Yamaha Music India ya 2008 küm tenzük ta ashi.

Nisung ajungmesotsü, sendakteptsü aser takum melenshitsütsü ken dak tashi lir ta pai ashi.

Kohima nung tanurtemi ken jangraba ngua pelaba lemsatepdang, iba project yagi parnok tarutsü jenjang yangerba nung yaritsü, ta Maruyama-i ashi.

Tesayur temi tongtipangtiba shilem agir, anungji system sülen anidaksüla aser angazüka pei tanurtem tajungba nung len anitsüla, ta pai ashi.

Yamaha Corporation's, Music Popularisation Group nungi Risaka Tokoro-i music education programme indang tongmelang agi lemsatepa liasü.

Public schools, talisa elementary level nung music education benoktsü atema Yamaha-i iba sentong ya 2015 nung tenzük, ta lai ashi.

Iba sentong ya Egypt, Colombia aser Vietnam densema linük kar nung lir, aser iba sentong ya ajanga Nagaland nunga music education tashi itshiba nung yaritsü imlar, ta ashi.

Iba sentong nung Joint Mission Director, Samagra Shiksha, Dr. Kevizakie Rio menden liasü.

NSEDM-i Kohima nung entrepreneurs nem training agütsü



Dimapur, Tsüklai/February 09 (TYO): Nagaland Skill & Entrepreneurship Development Mission (NSEDM), IDAN ajanga Nagaland tesem ajunga nungi micro entrepreneurs telok tilaka aser entrepreneurs akumtsü jangrar atema anogo ana Enterprise Readiness Support Workshop sentong February 6 & 7, 2025 anogotem Circuit House, Aradurah, Kohima nung ayongzüka liasü.

State nung entrepreneurs kisüing yaritsüsa NSEDM kübok yangluba workshop ibai mezüngbuba alitsü. NSEDM-i shisalen sayur den lungjemer workshop sülen follow up agia shilem agir nem mentorship aser handholding support agütsütsü nükjidong lir.

Shilem agirtemi iba workshop nung angazükba mapa kuma

inyaksü aser entrepreneurial journey tenzükba mapang len anitsüsa NSEDM team ajanga post-workshop module yanglu.

Iba sentong tenzükba I. Changsang, Under Secretary & Project Manager (I/C), NSEDM, IDAN ajanga jembidang entrepreneurship atema oshi oben aser background ya tetsükdaksü mesükdaksütsüla ta ashi aser itasen dak metaloka alitsü tangatetba nungi ainshitsü tongtipang ta nenshia ashi.

Osang shidak agüja, mentorship aser lenmang sayuba ya entrepreneurship asoshi tongtipang lir, koba ajanga mapa manguba tebilemtsü samatsür aser state rongsenketzüing tashi itdaksür, ta pai ashi.

Iba workshop nungya

Entrepreneurship Readiness and Mindset, Growth and Business Strategy, Digital Skills, Business Operations, Cost Analysis and Regulatory Awareness, Credit Linkages, aser Basic Financial Literacy and Risk Management onüktem nung mongintemi jembia liasü.

Shilem agirtem dang sorkari yariba credit schemes, business planning atema practical tools aser senotsü ketdangsüba indang angazükdaksü.

Tananü buba nung shilem agirtem dang Plan of Action exercise ajanga lenmang sayua parnoki pei business inyakyim nung tebilemtsü akaba jangjatepa itemji koktettsü lenmangtem bushitepa liasü.

Iba workshop tembanga shilem agirtem nem kulizüing kaket agüja liasü.

Diphupar nung mejangjaba tasü mang ka nguteta lir

Dimapur, Tsüklai/February 09 (TYO): Mejangjaba nisung tasü mang ka Shamrock School jakdang Central Jail anasa nguteta lir ta February 9, 2026 anepdang 1:30 ako meta tezüluba nung osang ka aru. Osang anguba sülen duty nung alirtem iba tesemi ao aser tasü mang ya reprangshima liasü. Iba tasü mang nung ajitetsüsa yiruba tarak meliasü, anungji kechi ajanga asüar meshiteter, ta Dimapur Police sangdong ka ajanga ashi.

Iba nisung ya arishi küm 40 shi tain aser sentsü tammang lir. Ozüing agi melaba maparen ajak

tembangba sülen tasü mang ya PM examination/identification atema District Hospital Dimapur Morgue nung bener oa lir.

Nisungba ya jeans sentsü tanen aser long pangt sentsü tanen den T-shirt sentsü tanak nung I Love Pink ta zülur, hoodies jacket sentsü tanak semer temeyong nung angoti inoka lir.

Kibur/kinunger/tembar temi Officer-in-Charge, Diphupar Police Station Chumoukedima den Mobile No. 7085055022 ajanga tongteprateptsü ayongzüker, ta sangdong ajangasa ashi.

Changki-Tai Ahom Cultural Connect ajanga tesendaktep jangrushishi



Dimapur, Tsüklai/February 09 (TYO): Jumaba Amphitheatre, Changki nung February 9, 2026 nü Changki-Tai Ahom Cultural Connect tenzükogo aser Changki aser Tai Ahom nüburtem putu aika tesendaktep tajung nung aruba asendenshia benjonger.

Iba sentong ya Trailblazer Society ajanga North East Zone Cultural Centre (NEZCC), Ministry of Culture, Government of India den lungjemer ayongzüker aser Changki Village Council yimpoksür asütsü, aser iba anogo ana sentong yagi nüburtem, tashi temeteter aser sobaliba shilem agirtem tali lungjemdaksütsü.

Sentong tenzükba Changki village gate nung sempet agütsütepba liasü. Tai Ahom delegation ya Dr. Prasanna Gogoi, Director, NEZCC-i anir lir aser parnoki jang ka, ak ka, an, entzü aser süngjanglijang aser aonsotsü agüja 1679 nung Changki nungeri Ahom chuba Doddapani jenokdaksüba bilemteta liasü.

"Asen tarutsü lanu putui asen tesendaktep tang nungi tashi ita lir ta metettsüla. Anogo ana nung ajangshibatam bener aotsü aser ozü Ahom kibong den lemsateptsü," ta Dr. Gogoi-i ashi.

Sempet agizüka Tsupongtsungba Changkiri, Chairman, Village Council Changki ajanga jembidang, "Asen tesendaktep akangshitsü aser asen lanu putu asoshi iba mapa takum yutsütsü asoshi ibai otsütsütsü mapang ka lir," ta ashi. Changki nungeri kidang amshiba osettsüset, parnoki yanglutetba, akhi amapang

nungi amshiba oset agüja liasü.

Mezüing anogo kin ana nungi taintemi 'Traditional Ritual Interaction' agia tenzük aser iba sülen Changki Sungkum nungi sentong agitsü aliba tesem tashi Unity March ayongzüka liasü. Dr. Gogoi-i akhi alemli mapang nungi tesendaktep aliba milak jangrushitsü asoshi iba sentong ya kanga shisadanga ayongzüker ta ashi aser Cultural Connect ya küm shia ayongzüka sensaksemba, research aser lanurtem shilem agiba alinung ajungtsü ta ashi.

Adela Moa, Director, Art & Culture, Government of Nagaland ajanga iba sentong nung jembidang, apu yanglushitsü, takum libaliru tashi itshitsü, aser tarutsü putu asoshi indigenous knowledge systems wazüka ayutsü atema sobaliba sapang ya tongtipang lir ta ashi.

Sobaliba sentong nung Mangko Yimrong Malu Waromung, Longkama Cultural Club, Yimjenkimong, Changki Orija Cultural Club, Society for Tai Ahom Resurgence (STAR) aser Indigenous Changki game ajanga shilem agia liasü.

Nikongdang sentong nung sobaliba sübosolemtsü aser Echoes of Harmony, Changki Choir, Dimapur Ensemble aser STAR Band Assam nungi shilem balala agia liasü.

Iba sentong nung Waromung, Yimjenkimong aser Tai Ahom scholars densema tejaoker nisung 300 dak tema aser local participants 500 dak tema dentagi.

Changki-Tai Ahom Cultural Connect ya February 10, 2026 nüa alitsü.

Ato kilonser Modi aser Seychelles Tir Herminie na senden amen



February 09, 2026 nü New Delhi nung Ato kilonser Narendra Modi aser Seychelles Tir, Patrick Herminie na senden amenba sülen High Commissioner of India to Seychelles Rohit Rathish aser High Commissioner of Seychelles to India Lalatiana Accouche nati 'documents' melentepdang tangokba noksa nung angur.

New Delhi, Tsüklai/February 09 (Agencies): Hombarnü New Delhi nung Ato kilonser Narendra Modi aser Seychelles Tir, Patrick Herminie na senden amen.

Hombarnep Seychelles Tiri Rajghat semdanga Mahatma Gandhi nem akhüm agütsü.

Herminie-i Chennai aser Mumbai na semdangba sülen Amongnü Delhi-i ao.

Yaküm October ita nung pai Tir tenangzükba agiba sülen tang pai mezüng pai India semdanger. India aser Seychelles na tsüngda tesendaktep yangluba sülen küm 50 ajungba küm nung pai

India semdanger. Pa February 10 nü meyipa aotsü.

Ministry of External Affairs (MEA)-i sangdong ka ajanga, Chennai aser Mumbai na nung Herminie-i sorkar ketdangsertem, industry, coastal management aser healthcare nung tongti ketdangsertem ajurua linük ana tsüngda amalitep tashi itshitsü atema jembio, ta metetdaksü.

MEA-i, asetkong linük Seychelles ya India nunger asalentong tsütsü kanga tongtibang linük ka lir aser India Vision MAHASAGAR nunga tongti partner ka lir, ta metetdaksü.

Tir Herminie-i Tir Droupadi -a ajurutsü.

Chennai nung Herminie aser Seychelles Minister of Health Marvin Nolan Fanny nati SIMS Hospital Chairman, Ravi Pachamuthu ajurua healthcare services tashi itshitsü, super-speciality medical outreach, hospital infrastructure terenlok, digital health, jenjang dalang agi mozü aser dialysis atema jembia liasü.

Mumbai nung Seychelles Tiri Minister of Ports, Shipping & Waterways, Sarbananda Sonowal ajurua investment densema sector balala nung amalitepa inyaksü atema jembia.

SC-i EC dang Bengal nung SIR atsülangtsü tuyu

New Delhi, February 09 (Agencies): Hombarnü Supreme Court-i West Bengal nung final electoral rolls sangdongtsü atema hopta ka atsülangtsüogo.

Tang tagidak Special Intensive Revision (SIR) exercise nung tetsükdaksü agütsütsü atema shinga danga memelatsü, ta SC-i metetdaksü.

Election Commission-i staff agi meperiba, software tsütsü timtem adokba aser tensa majungba tashishibatem metetdaksüba nung ajemdaker Supreme Court-i state sorkar

danga tangsa ketdangsertem lemozükjang; SIR inyakyim nung tetsükdaksü kecha melidaksütsüla, ta tuyuogo.

"Sorkar ketdangsertem tasen aika shimokogo, anungji tashishiba agütsürtemi agütsüba documents repringshitsü atema ano mapang tali agitsü. Anungji item maparen renemtsü atema onoki Electoral Registration officer nem February 14 nungi tenzüka ano hopta ka mapang agütsür," ta Chief Justice of India Surya Kant-i metetdaksü.

Court-i state sorkar danga Group B officers 8,555 jagi

Mongolbar nikongdang 5:00 ako tashi nungbosa district election officers ajurutsüla, ta tuyu.

West Bengal chief minister Mamata Banerjee densema nisung balalai SIR dak sendakba nung benokba ken o aika CJI den Justice Joymalya Bagchi aser Justice N.V. Anjaria nungeri akümba bench-i angadanga liasü.

Taoba hopta ken o angadanga mapang nung Mamata Banerjee-i SC matsüngdang ken o jembia liasü saka Hombarnü ken o angadanga mapang nungbo la maliasü.



February 09, 2026 nü Kochi nung aliba Cochin International Airport nung CIAL Aero Park semzükba sentong nung adentsü atema Kerala Chief Minister, Pinarayi Vijayan arudang tangokba noksa nung angur. Kasa noksa nung state minister tem- P. Rajeeve, M.A. Yusuf Ali, MLA Anwar Sadath aser MLA Roji M. John nungera angur.

Opposition-i LS Speaker Om Birla agientsü atema bangzüng renemtsü

New Delhi, February 09 (Agencies): Budget senden nung o jembitsü atema Opposition lenir, Rahul Gandhi nem temelaba magütsüba nung ajemdaker Opposition-i Lok Sabha Speaker, Om Birla office nungi agientsü atema bangzüng ka renemtsü lemetetogo.

Osang angazükba agi, linük temzüng kübok Arrla 94-C nung ajemdaker opposition-i bangzüngji renema benoktsü.

'Motion of Thanks' o jembitsü atema Lok Sabha nung opposition lenir nem temelaba magütsüba, BJP MP Nishikand Dubey anema meinyakba aser kuli kecha makai Congress nungi tetsür MP tem nem tai tongloksüba kulitem nung ajemdaker Lok Sabha Speaker Birla agientsü atema bangzüng benoktsü.

Iba motion nungji ishiba agia MP 100-ibosa sign asütsü nüngdaker aser tang party balala nungi opposition MP tem signature bendendar.

Hombarnep Congress Tir, Mallikarjun Kharge indang chamber nung opposition mapang nung iba telemetbaji agi. Iba senden nungji Trinamool Congress, Left parties, DMK, Samajwadi

Party, RJD, Shiv Sena (UBT), NCP (SP) aser RSP nungi lenirtem aden, ta osang angazükter.

Congress party-i, Lok Sabha nung opposition atema maongka kecha mali, anungji repringa dang ata liang, ta metetdaksü.

Congress MP, K C Venugopal-i, Lok Sabha nung pei tebilemba lemsateptsü atema Rahul Gandhi densema Opposition lenirtem nem temelaba magütsür, ajisüaka sorkar nung alirtem nembo sademsadema o jembidaksür aser tashishitsü o jembidaksür, ta metetdaksü.

Parliament kima osangbenertem den jembidang Venugopal-i, "Tang Parliament nung kechi atalokerar nenoki angur. O jembitsü atema opposition Lenir, Rahul Gandhi nem temelaba magütsür. Sorkar tsütsülen nungibo kechi jeminüdir jembir. Parnoki nisung mashie anema jembitsü akok, tashishitsü o jembitsü akok aser asürtem anema-a jembitsü akok. Ano külen Speaker-i Congress nungi tetsür MP tem nem tai tongloksür. Iba House nung opposition atema maongka kecha mali," ta metetdaksü.

Wangchuk temang kanga junga lir: Centre

New Delhi, February 09 (Agencies): Hombarnü Centre sorkari, climate activist Sonam Wangchuk temang kanga junga dang lir, aser tepuokdak aliba mapang AIIMS, Jodhpur nung treatment tajungtiba agidaksür, ta Supreme Court nem metetdaksü.

Centre tenüng nung jembir Additional Solicitor General K M Nataraj-i Justices- Aravind Kumar aser P B Varale nati akümba bench dang, Wangchuk chioktsü atema tang tashi nungbo tebilemba mali, ta metetdaksü.

Ken o tetenzüklen Justice

Kumar-i Nataraj dang, court-i Wangchuk temang mejungi aliba nung ajemdaker pa chioktsü atema shisadangang ta tuyuogo, anungji telemetbaji karbo agir asü?, ta asüngdanga liasü.

Ajioda Additional Solicitor General-i, "Ni metetdaksütsü. Tang tashi nungbo kecha meinyak. Pa nem medical treatment tajungtiba agütsüdar," ta metetdaksü.

Wangchuk atema ken o jembitsür kati, pa chioktsü atema asadangtsü mapang tongogo, kechiyong pa temang mejungi lir, ta metetdaksü.

(Maneni tapak 8 nung...)

HINDUSTAN PETROLEUM CORPORATION LIMITED
 (A Maharatna Company)
 Petroleum House, 17, Jamshedji Tata Road, Mumbai-400020

Polymer Business atema DCA-cum-CS shimsü
 Hindustan Petroleum Corporation Limited ya Maharatna Company ka lir. HPCL indang businesses aika lir, aser item rongnung Retail, LPG, Aviation, Fuels, Lubes aser Petrochemicals densema lir. HPCL-i Polymers marketing atema DCA-cum-CS shimsü. Application inyakyimji online ajanga dang asütsü (Online submission atema tatembangbuba anogoji- 31/03/2026 anogo nikongdang 4:00 ako tashi) aser tejangartemi URL: <https://petchem.hpcl.co.in/dca-cum-cs> ajanga application form fill-up asütsüla. Online ajanga application agütsüba sülen, download asüba application form den nüngdaka enclosures/attachments ajak renemer Petrochemical SBU, 7th Floor, C Wing, Priyadarshini Building, RCF, Eastern Express Highway, Sion, Mumbai-400022 nem April 15, 2026 nü nikongdang 4:00 ako matongdanga agütsütsüla. Osang jangjashitsü atema Ph: 022-24068293 / 24068297 / 24068208 ajanga tongtepratepang mesüra email petrochemical.marketing@hpcl.in ajanga yokang.

DURAPOL

www.hindustanpetroleum.com

PUBLIC NOTICE
 Registered Office: ICICI Bank Tower, Near Chakli Circle, Old Padra Road, Vadodara- 390007
 Corporate Office: ICICI Bank Towers, Bandra-Kurla Complex Mumbai 400051

GOLD E-AUCTION DEN INVITATION NOTICE
 Tsünglanglen shia aliba sen apurtem nem notice agüja gold ornaments facility ("Facility") ajanga ICICI Bank Limited ("ICICI Bank") dang agiba sentshü agüjang ta metetdaksü liasü. Onoki pledged gold ornaments ji February 20, 2026 nü E-Auction asütsüsa akümer, kechiyong pamoki sentshü magütsüet. Jella memetetdaksü account agientsü/E-Auction anogo melenshitsü atema ICICI Bank dak tashi lir. Auction ya online ajanga- <https://jewel-auction.procuretiger.com> nung nikongdang 12:30 ako nungi nikongdang 3:30 ako tashi agütsü. Telatetbatem aser osang tejangia atema agüja aliba website nung repringang. Sen apurji süadoker süra telatetba ajakji senmangertem dak benshitsü.

Loan A/C No.	Customer Name
Branch Name: Dimapur	
047662001375	Hassan Ahmed

Date : 10.02.2026
 Place : Dimapur

S/d Authorised Officer
 For ICICI Bank Limited



TIR YIMYIM YIMOBILEM (EDITRIAL)

DIMAPUR TUESDAY, FEBRUARY (TSÜKLAI) 10, 2026

Merenemtetba lenmang !

Nagaland nung atalokbatem rongnung langka tajung lira, aji tenemtsüing lenmang (Foothill Road) atutsü tenzükba, Dimapur nung state stadium yanglutsü tenzükba aser Kohima nung High court ki yanglutsü tenzükba aser iba amaji nübortem nungdak repringteta terenlok mapatem inyaksü jet ta tenzükba mapatem ya asütsü. Ajisüaka, ano külen Nagaland nungsa atalokbatem rongnung tezüdangtsü aser tejashitsü aketba mapa tamajungtem indang bilemdangra, terenlok mapa tajungtem tenzüker kümsa küm merenemtet ajokshiba aser anenadokba ya ka asütsü. Atangji, itemji dang masü saka government kiojen karbo renemer mamshitet arem kümdaktsüba mapatema lir. Item ajak rongnung tang asenok kanga rongdak nungdak ser nung merenemtet ajokshiba mapa kaji 'Foothill Road' mapa ya ka asütsü. Tangar asübo, iba lenmang yabo joko linük nung tongtibang lemanj tejen ka küma anogo shia khu abenba aser nisung amenba gari merijang junga oli aruli ta jajaya lila. Aji oda, asenok asoshi 'Foothill Road' ama yabo gari jajaba lenmang dang masü saka lenmang songjenji nübortem asoshi sen aadak tesem yimti tulu tajung ka küma renloktsüba ser nung merenemtetba ya tesüngmangtsüka lir. Iba lenmang yanglutsü asoshi nübortemi longkak dena aita government nung alirtem den tamajung tentepba mapanga ajuruogo. Ajia tangar asoshiibo tesüngmangtsüka asütsü, kechiyong tangarbo nübortemi memeshi aser masüngdangdangyongi government-i lenmang tasen yanglutsür aser lenmang tejentema tuluba aser tajungba küma anepalutsür. Ajisüaka, Nagaland nungbo nübortem jajatsüba lenmang tongtibang ka yanglutsü asoshi longkak ait atatsü aser idangji khen tenzüka inyaker amato inyaksü aser anenadoktsü aser ano nübortemi ola adoktsü aser ano idangji khen arakzüka inyaka sayutsü ta küm süitemdaktsüba agi, mapa tenzüker merenemdang jubilee amongtsüba küm tongdaktsür. Atangji, tangbo Nagaland PWD (R&B) minister-i anir engineer-temi tenemtsüing lenmang yangluba jenjang tsüngdong oa repranga jajaba nungji asangsang nung mapa renema inyakdaktsünüba tangatetba, tejangraba aser temulungtetba repringteter. Ibajiang shitakba 'minister' ta asüba ojang tetezü mapa agi inyaka sayur. Aji oda, government-i nangzüka ama iba tenemtsüing lenmang tang tenzüka alibatem yabo, nübortemi longkak aita merongshiyonga, March 31, 2026 tashi nungbo renemtsü imlar. Atangji, tebilemtsü kaji, tesem kar nung tang tashi ali kiburtem o government na tsüngda lenmang tua aotsüba tesem asoshi mangatettep adoka aliba ya asütsü. Aji oda, government-i tamasa lenmang yanglutsü asoshi len lepboka orr shimtetba tesem mesüi, nisung kar tsütsü atsünga oa melenshia lira, ibajibo tim masütsü, anungji lenmangji government asoshi masü saka nübortem asoshi yanglur asünungji, nübortemi aginübalen atsünga oagi yanglura iba jagi lenmang yangluba nükjidong ataloktsü. Joko, asenoka tangar mesüka government-i nübortem asoshi inyakba terenlok mapatem, gari lenmang süli, kiojen süli, pei ajangzüksü asoshi dang bilema masü saka pei lima topur jungdaktsütsü aser nübortem ajangzükdaktsütsü bilema government nung alirtemia, department nung inyakertemia aser contractor-temia mapang shitak nung mapa shitak renemtsütsü mulungtettsüla. Talisa, Foothill Road yabo ali kiburtemia alimenok magi aser linük tenzükertertemia kecha sarua magi ta ser nübortemi nungita inyakdaktsüba mapa ka lir, anungji iba lenmang mapang shitak nung merenemtettsüabajibo yutsür, mapang shitak nung mapa shitak renemer nübortem nem agütsütsü tim. Atangji, alima nung yimten nüchiso bushiba mapa nung dang masü saka contract mapa inyakbaren nunga pei tetsü tasoli meimba shisatsü nungdaker, iba jagi dang pei dangbo pei lima aser nübortem temeimba meima contract mapatema inyaksü aser government mapa nunga tenzüksü. Iba ama pei lima meimba shisatsü "patriotism" jagi, tangbo, merenemtet aliba lenmang ya mapang shitak nung topur junga renemtsütsü nübortemi imlaseta atar.

OLEMSABANG

"MANOKSHIBA LUNG

~ Sakurepla Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Oja! Sakang -

Pai ajak abensatsür Taochila aser tenu ana kidangi joko tazüngtsü ajak zünger tetsü den ajuruteptsü yongyaseta kidangi shilang. Iba aonung parnok külemi lungjemer Tsüngrem tenüing sanga parnok ajak anema Pa taochi agi ajurutepdaktsüba asoshi tenüingsang agüja sarasademer külen mejangtsü pei pei taktangi senshitsü lia, Ashilai tanur asem dang tongtibang o ka ashitsü khen arua menang ta ashi. Tashi angaa par asemji tetsü anasa atepzüng nung mener ojalai kechi o ka ashitsüba atang asür ya ta bilema amen. Idangji tetsüi la tebang lapoker ola tanep agi par pezüi mapang tatsüka tsüngda nung tepela, tejashi aser takotzü marok jenti menakdangogo aser item ajakji ajangshiba agi par pezü ano alima wadang aser tanelar wadang nunga tali dang ain ta ashi. Anungji item tatalokba aser ajangshiba ajak ya Tsüngremer sentong aser ano Pa temeim tali lar kibong nung jungkai adokba ka dang ta angatetdaktsüba mapang ka liasü, anungji Laishiba nung shia aliba ama Mathi 6:14-15 "Kechiaser nisungtemi aibelenbatem nenoki parnok dang tokra, nenok kotaker Tebuia nenok dang atoktsü. Saka nenoki nisungtem dang parnok aibelenbatem metokra, nenok danga matoktsü." Ashilai tanurtem dang Lai o nung shia aliba ama, tebu parnok dak kanga mejungi inyak aser par kibong ayatai nung toktsür pabo kecha tai mali ama taküm tasen ka tenzüka tetsür tasen agi. Iba lima nungbo tebu inyakbaji tatok agütsütsüba khenyongi malang saka kechi komaka süaka Tsüngremibo parnok nem anogo shia Pa taochi agi meimchiri inyaksaba ajak nung tatok agütsür aser mangyangba aser obendangbaji Tsüngrem meyong. Anungji Tsüngrem tenüing nung tanur asemi tebu nem tatok agütsütsü lai mepishi aser tebu dangi oa tesendaktep tajung yanglutsü iba aonung tanurtem dang ashi.

Tanur asemi mezüngbo tebu nem tatok agütsütsü o angashidang, kanga dang memulungi liasü saka jembia aodang parnok mulungjang nung tetsüi ashiba o jagi kongshi aser tatem nung tatok agütsütsü mulungteter iba aonung süidaktsü. Hopta ishika süir külen, Taochilai anir tenu parnok tebu alidak ki bushia temulung nung tashitsü aser tejembitsü jenti bener tebu dangi ao. Tebur kidangi ayaketa atu nung, tantsür ka den tanur ka atep nung mener angu. Taochilai la den jembidang yakta dang tantsüla jagi Medem Medem ner tanur asem kidangi arua lir ta pelaseta kinungboji aja. Idangji taktang telung nungi tebuji tenük nung nüktzü mesemi tsünger adok. Tanur asemi tebu angudang khenbo aoksa kechiaser tebu sorubangro to akhi ama masü saka ku tanak ajakto tambur asa taor ama mesünga kümer temang nung tashi kangabo mali kümer liasü. Tebu par asem den salemer otsü atongtsü amen. Taochilai tebu dang par asem züngtemer joko mapa asoshi tatidang balala agüja lidar aser parnok lia aruba otsütem tatsü agi ashidang, tebu yakta dang par asem tsüngdang mokrema kümer pai parnok den mejungi beshiba asoshi tatok meshia ajep. Par asemi tebu ajepba ngua, atangji tebu pa aibelenba indang bilemteta aruogo ta angatet aser jabasoi yakta dang tebu dang par asemi tatok agütsüogo, anungji pa temulung süngzükan aser parnok ajak anema taküm tajung nung lungjemdaktsüba asoshi Tsüngrem nem tenüingsang agütsüdi ta shir tebu kinungtsü aser tanurji jar parnok ajaki Tsüngrem dang tepela ola yoka sarasadem. Sarasademer külen tebu tanur asem dang pai par kibong ayatai jenjangi lua raksatsüba yong Tsüngremi pa merenshi aser ita aika yipden nungi saktsü mekoki shirang aser iba shirangba jagi pa sentsü ajak melena kümadok aser tanübo tangar ama inyaka alitsü tashi mali ta ashi. Joko pa temang tashi maitba dang akümer aser pa pension jagia par kibong meperir ta alidang, pa kinungtsüi tia ka, pa medoktsüi dokan ka lapoker iba jagi kibongji mesür ta ashi.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yirusalem nung raliwalirtem atema 'Pilgrim's Path' lapoktsüogo



Pilgrim's Path

Jerusalem, Tsüklai/February 09, 2026 (Agencies): Yisu Khrista alima nung aliba mapang nung Silom tzübo nungi Yirusalem nung Temple Mount tashi yangluba lenmang tang mezüing public aser raliwalirtem atema lapoktsüogo.

"Pilgrim's Path" ta ajaba lenmang ya Herod Chuba mesüra Pontius Pilate tetuyuba nung yangluba lenmang lir ta bilemer.

Archaeologist temi küm 20 shi iba lenmang nung ali tua bushisüngdanga liasü. Iba lenmangji Palestine nütsüing teimba aliba kiyong ka telung nung lir.

Kasa tesem nungji Yihuda nungter külemküja dak sendakba nung tzü chigoba tesem aser sabang kata liasü. Iba sabangji yimjak nung sangdong agütsüdang mesüra Laishiba azüing dang amshi asütsüa akok ta bilemer.

70 AD nung Rome nungertemi Jerusalem yimti raksatsüyonga iba lenmang yabo meraksatsüi liasü.

Iba lenmang nung ali tua bushisüngdangba mapang nung Palestine nungertem aikati pei kiojen raksatsü tsübuashishia liasü. Ajioda kiojen meraksatsütsü nükjidong nung lenmang tasenji 'concrete' aser insang agi yanglu.

Iba dak alia ali tua bushisüngdangbaji east Jerusalem nung mangatettep aliba tesem nung lir ta ashishitepa liasü. Ajisüaka 'Pilgrim's Path' ji raliwalirtem atema lapoktsüogo.

Pilgrim's Path lapokba sülen iba lenmang nung mezüing jajartem rongnung ka, Shira Greenspan-i, "Iba lenmang nung jajar mezüingpur ka ama iba ya ni asoshi maongka tulu liasü. Iba lenmang nung jajaba ya tajangshiba tasen ka liasü aser tetezü kanga keta liasü. Ajungbena ni küm meyrjang aika den sendaktepa aküm. Iba ya tesüingmangtsüka liasü," ta metetdaksü.

ANO GO ABEN TSÜNGREM DEN

Shibai kibuba tenüing asangtsü (T.ken 106:1-5)

"Shibai Kibuba mapa tulu indang shitettsü, mesüra Pa nüngsang ajak shibai sangdongtettsü?" (t.2).

Shibai atangji nung Kibuba tenüing asangtsü? Shirnoki Pa dang tashi angar parnoki sangtettsü. "Shirnoki ochiba benshir, shirnoki mapang ajak nung shitak inyaker, parnok temoatsü" (t.3). Asenoki Kibuba den jajara aser Pa dang tashi angara, idangji asenoki Pa tenüing sangtettsü aser Pa tesüingmangtsü mapatem indang jembitsü.

Ano, shirnoki Kibuba tenüing nung jadiri Pa tenüing asangtsü akok. "Ne nübur tsütsü, ne yimli sayudang, ni bilemtetangma, O Kibuba ne tekümtet agi ni semdangangma" (t.4). Shirnoki sarasademer parnoki tenüing asanger. Shirnoki parnok taküm nung Tsüngremi inyaksü asoshi sarasademer parnoki Pa mapa nung pelar.

Tatamsa, shirnoki Pa tenangzükbatem nung amanger parnoki Kibuba tenüing asangtsü akok. "Angji ne teshimtetpur azükaruba ni ngutettsü, angji ne tepela nung ni pelaseta litettsü, angji ne senmang den ni sentsüwangshia litettsü" (t.5). Tsüngrem Pa nübur dang Kanan nung senmang ka akatsü nangzü, aser Pai ibaji parnok nem agütsü. Tang asenok senmang Khrista nung kar. Asenok chubatem dang nungi takaba lir, aser asenoki iba senmang dangi aotsü akok. Asenoki Pa tajung aser tepela lemsateper, aser kenü asenoki Pa sentsüwangshi nung lemsateptsü. Asenoki tanü Pa tenüing sangdi.

Shirnoki tashi angar, amanger aser Kibuba dang ajar parnoki Tsüngrem mapatem metet. Parnoki Tsüngrem mapatem metet. Parnoki Yisu Khrista nung parnok senmang akanger. Na Kibuba tenüing asangertem rong nung atener asü? Nai ne senmang meshia lir ma?

Gaza nung tang tashi rara metembang: Gabriel Romanelli



February 08, 2026: Gaza nung Khristan putir kati, Gaza nung ano rara metembang; ceasefire tezüingzüktep yangluaka rara ajanga nüburtem maneni timtemer, ta metetdaksü.

Khristan melungtet telok Aid to the Church in Need (ACN) den jembidang Roman Catholic Arogo nung putir, Gabriel Romanelli-i, maneni bomb amshia amakba, kiojen raksatsüba aser nisung asüba manener, talisa Yellow Line adener rara manener, ta metetdaksü.

Yellow Line ya yaküm October 25 nü ceasefire tezüingzüktep yangluba mapang amenokba sepaitem indang frontier ka lir.

Ceasefire tezüingzüktep yangluba sülen-a Palestine

nunger 500 dak tali süogo aser Bodhbarnüa tetsür-tanurtem teimba ser nisung 20 süogo.

Putir Romanelli-i, "Gaza nung alir nisung million 2.3-i tanaben asentenshir taküm yangertsü atema teyari nüngdaker. Nisung meyrjang aika süki nung alir, arrtsütem shibanga lir, tzü aser light agi timtemer; item kuli ajanga tashidak kanga proker," ta metetdaksü.

Romanelli-i, Latin Patriarchate of Jerusalem aser Aid to the Church in Need densema organization balalai teyari agütsüba ajanga timtem tuluka tongzüker, aser tang tashi Latin Patriarchate of Jerusalem-ibo Gaza nung timtemer kibong meyrjang aika yaria arudar, ta metetdaksü.

Turkey-i Khristan missionary tem tanaben arutsü memelar

February 09, 2026: Khristan missionary tem küm aika Turkey nung lia aruaka parnok tanaben Turkey-i arutsü memelar, ta Khristan melungtet legal telok kati metetdaksü.

Khristian legal charity telok Alliance Defending Freedom (ADF)-i European Court of Human Rights (ECtHR) matsüing dang ken o 20 shi benoka, Turkey sorkari missionary tem linüki tanaben marudaksüba ya amokmeren den kasa lir aser yimjung meimba Khristanem bendanga züingshiba lir, ta metetdaksü.

2019 küm nungi tenzüka Turkey nung ketdangsertemi Khristanem indang passports nung internal security codes-"N-82" aser "G-87" ama amshir.

Item codes ya kiralongra den sendaktepa lir aser item codes ya bendanger Khristan 160 aser parnok kibongtem anema amshidar, ta ADF-isa metetdaksü.

Khristan missionary temji tanga linüktemi aoba sülenbo tanaben Turkey-i arutsü memelar aser residence permits magütsür, ta ADF-i

metetdaksü.

ECtHR-i item ken oji Turkey sorkar nem-a Turkey linük nung metetdaksüba den külemi Khristanem anema inyakba ketdangsertem dang iba dak kanga bulua ataloker, ta sendakba nung telangzüba Association of Protestant Churches-ia metetdaksü.

Iba ozüing kübok Pam aser Turkey nung tesempa agi Dave Wilson nata takoksa Khristanem anema inyakba angurtem rongnung dena lir. tatalokbatem kanga bulua Tena küm 40 tashi Turkey akümba aser sorkar nung lia aruogo saka tanaben ketdangsertemi senso iba linüki aittsü memelar. Ano Khristan kibong kata Arogo Khristanem aser bendanger conference ka nung adentsü Khristanem anema inyakba aoba sülen code N-82 agütsü osang parnoki metetdaksü. aser Turkey nung küm 19 tashi Tesüiba kümtem den missionary inyaker, David medemdangra Turkey nung Byle-a tanaben linüki arutsü Khristanem anema inyakba memelar. kanga bulua kümogo. Linük nung Tenla ki aika nung injang ADF Director of Advocacy khaloktsü, Tenla ki bendoktsü for Global Religious Freedom, aser Khristanem amokmerenba tatalokba aika. Kelsey Zorzi-i, "Item Turkey nung Protestant Khristanem ya iba linük nungji Arogo 200 shii dang lir aser lia aruogo. Parnoki Turkey tekülem sentong agitsü atema sensotem den kibong aküm item Arogotem nem 'rent' aser parnok chirnurtem-a magütsür aser official Turkey nung lir. Parnok temelaba magütsür. kangshia pei kibong den Sorkar ketdangsertemi züingsemtem den piladaksüogo," ta metetdaksü. Khristan shisaliok memelar, "Iba ya ajanga Khristanem ibayongji Arogotemi seminars kanga mejungi kongshir, dang ayongzüka agir aser kechiyong Arogotem nung bendanglen dang training santem mesütsü atema agitsüsa akümer.

AO OSHI ANGAZÜKDAK:**TANÜ ANGAZÜKTSÜBA OJANG****Tzümeno**

(adv) tzüyokdang yimer tuguseper külen ayong nung mengujemi aliba ango bushiba

(Searching for leftover / unseen fishes after community fishing)

* Onok medemertemi tzümenoba mapang ango tuluka apu.

Tzümesü

(n) ayong nungi tzü mesüa bener aruba (irrigation)

* Tzümartemi ayong nungi tzümesüa bener arua tzülu ayimer.



Tir Yimyim

OLONG PAITEP # 7410

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemsa
10. Anogoshi
12. Ajanga aor
13. Tsük rizüingdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7409 TELANGZÜBA**TIPIEN :**

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

Thailand yimtiba Bangkok ya alima nung tenüng talangtiba tesem lir aser iba atema Guinness World Record yangluteta lir.

Bangkok ta asüba nungbo ojang tenet dang lir saka iba ya English version lir aser chichiba tenüng nung ojang 111 dena lir.

Parnok oshi agi "Krung Thep Mahanakhon Amon Rattanakosin Mahinthara Ayuthaya Mahadilok Phop Noppharat Ratchathani Burirom Udomratchaniwet Mahasathan Amon Piman Awatan Sathit Sakkathattiya Witsanukam Prasit" ta ajar.

Iba tetezüji English nung "The city of angels, the great city, the eternal jewel city, the impregnable city of God Indra, the grand capital of the world endowed with nine precious gems, the happy city, abounding in an enormous Royal Palace that resembles the heavenly abode where reigns the reincarnated god, a city given by Indra and built by Vishnukarma." ta meyipzüker.

Digboi nung contract workers-i labour codes anema lungkak ait

Digboi, February 9, 2026

(Agencies): Digboi nung contract workers noklang aikati Centre sorkari shidangba labour codes anema Deobarnü bike rally ka ayonga agiogo.

February 12, 2026 nü linük ajungalen general strike nung public-ia pusema nungittsü ayongzüker ta parnoki metetdaksü.

Item codes mapa küma inyakba ajanga job security mali akümtsü aser mapa agütsürtemi parnok mulungka nung mapa

inyakertem agientsü temelaba agütsütsü. Iba system tasen ajanga mapa inyakertem tangutsü tim mangutsü aser trade unions samatsü ana nung dang lir ta lungkak aitertemi ashi.

"Tesüiba nung labour laws 19 liasü aser itemji Centre-i codes pezü dang kümogo. Iba jagi Digboi Refinery nung contractual labour unions ajaki yimdong nung lungkakaiter. Iba rally ajanga onoki Centre sorkar dang labour codes meyipa magira onoki tuluba lungkak aittsü osang metetdaksür"

ta lungkak aiter kati ashi.

"Modi sorkari Adani aser Ambani ama corporate giants taginüba tongtsütsü atema codes mapa tenzüker" ta Petroleum and Gas Workers Federation of India nung General Secretary Nagen Chutia-i ashi.

Parnokisa Digboi Refinery nung production capacity teimba akümtsü, iba tesem nung alir nem safe drinking water agütsütsü aser educational facilities tajungba akümtsü takhangbatem agütsüogo.

Gaurav Gogoi ya 'Pak agent' süra kechiba mapur? Assam opposition

Guwahati, February 9, 2026

(Agencies): Chief Minister Himanta Biswa Sarma-i ashiba ama Congress lennir Gaurav Gogoi ya shitakba Pakistani agent ka süra kechiba pa mapur ta Assam nung Opposition party temi asüngdang.

"Gogoi ya Pakistan atema agent ka ta Chief Minister-i amanger. Pakistani agent tetezü ashioktsürtem. CM-i kuli lir ta ashir süra kechiba tang tashi Gaurav Gogoi mapur?" ta Rajjor Dal MLA Akhil Gogoi-i asüngdang.

"CM Sarma-i osangbener senden nung the Special Investigation Team (SIT) report indang jembibaji jilushi ka ama lir. Assam nung social media posts aser sangro züluba atema nisungtem puogo. Sorkari ibala onük atema nisungtem apur süra, Pakistani agent ta ajar ka kechiba mapur" ta Akhil Gogoi-isa ashi.

"Sarma-i osangbener senden mapang Gaurav Gogoi-i Pakistan ISI den tesentaktep aliba kulitem magütsütet. Chief Minister-i yimtenren mapa nung Assam

Police indang SIT benoker aser ibala mapa ajanga public-i özüng amertem dak temulung alemba samatsü akok" ta Assam Jatiya Parishad (AJP) president Lurinjyoti Gogoi-ia ashi.

Gaurav Gogoi, pa British kinungtsü Elizabeth Colburn aser Pakistani senso Ali Tauqeer Sheikh nunger tsüingda tesentaktep tajung liasü aser Intelligence Bureau nungi osangtsüsang Pakistan nem sangoktsü ta Deobarnü Chief Minister Himanta Biswa Sarma-ia ashi.

Arunachal CM-i Donyi Polo prayer centre lapoktsü

Itanagar, February 9, 2026

(Agencies): Arunachal Pradesh Chief Minister Pema Khandu-i February 8, 2026 nü Donyi Polo Kargu Gamgi lapoktsüogo.

Itanagar anasa Modirijo nung CM Khandu-i Donyi Polo tamangertem indang prayer aser cultural centre tasen lapoktsü.

"Itanagar Donyi Polo Kargu Gamgi Council, Central Donyi Polo Kargu Gamgi Council aser shilemagir ajaki Mapang talangka nungi aginüa aruba ka külemi aser public-i shilem agia asangsang nung atalokba atema tenüngsang agütsür" ta CM Khandu-i ashi.

Iba centre yangluba nung Galo nunger teimba ser nisung 700 shi kati tenla agütsüogo ta pai ashi.

"Iba Gamgi ya kiojen ka dang

masü saka iba ajanga asen tera, asen tamangba aser asen maitsü sayur" ta paisha shisem.

Arunachal Pradesh nung lisopur tamangba yimsü balala lir aser kin shia indang maitsü den sendaktepa lir. Item sobaliba kümzüka ayutsü atema state sorkari Department of Indigenous Affairs tentet aser iba ajanga Kargu Gamgi, Nyedar Namlo aser Ganggi amala indigenous prayer and cultural centres yanglur aser tashi itdaksür ta CM Khandu-i metetdaksü.

"Asen tamangba yimsü, sobaliba, oshi aser inyaksangshi den pilatsü makok. Asenoki asen tera samara, asen maitsü samar. Lisopur tamangba yimsü wazüka ayuba ya tanga tamangba yimsü

anema noktakba ama mezüingshitsüla. India ya secular linük ka lir aser lisopur tamangba yimsü kümzüka ya tangar anema masü saka maitsü kümzüka ayuba dang lir" ta paisha ashi.

State sorkari ICCS, RIWATCH (Roing) aser Indigenous Faith & Cultural Society of Arunachal Pradesh (IFCSAP) amala rejutem den külemi yaritepa indigenous studies atema university ka lapoktsü maparen inyakdar ta paisha ashi.

Iba university ajanga Arunachal Pradesh nung indigenous faiths aser cultures indang research, documentation, education aser curriculum development maparen inyaktsü ta CM Khandu-isa metetdaksü.

Venezuela-i opposition lenir Guanipa tanaben apu



Juan Pablo Guanipa

Caracas, Tsüklai/February 9 (Agencies): Venezuela indang public prosecutor office-i sangdong ka ajanga opposition lenir Juan Pablo Guanipa chiokba sülen mapang tatsüka dang lir tanaben apuba metetdaksüogo.

Hombarnü office sangdong ka ajanga ashiba agi, Nobel prize ngur alila Maria Corina Machado den sendaktepa aliba arishi küm 61 tain Guanipa yagi Deobarnü pa chioktsü atema nangzüktepba ama minyak. Ajisüaka office-i iba dak alaka tanga kuli magütsü.

Guanipa, shiba Venezuela National Assembly tatong tir liasü, pa ita aika jenshia senzüba sülen mezüngbuba 2025 küm

May ita apu. Pa Deobarnü chiok aser pa-a January 8 nü nungi yimden yimsüsüba dak sendakba tepuokdak yua aliba chiokertem rongnung ka kümogo. United States-i nongshiba sülen Venezuela nung tepuokertem aika chiokdar.

Tir Nicolas Maduro US nunger sepaitemi linük yimtiba Caracas nungi pur aoba sülen hopta ishika lir yimden yimsüsüba dak sendakba nung tepuokdaki yoker alirtem chioka arudar. Maduro ya temesepba mozü aser prangbong shibelenba dak sendakba nung aitsür lir. Kasa mapang nung pai pa kecha nunga aibelena mali ta shia arudar.

Guanipa'er jabaso Ramon-i

tepu apuba ya temzüng ozüing alema tashiyim agi apuba ka ta ashiba den, pa ya mejangjaba nisung tershika arua pur ao ta shisem. "Onoki pa taküm aliba kuli agütsütsü aser tanga tang chioktsü akhanger," ta Ramon-i pa tebu indang X page nung lemsatep.

Machado-isa, Guanipa ya "kidnap" asü aser iba tatalokba ya Caracas kübok Los Chorros kiyong nung ataloka liasü, ta ashi. La pusemertem dangi X ajanga osang yokba nung Machado-i, Guanipa ya tanga tang chioktsü khangogo.

Pa mapu tsüingda ghonda ishika lia Guanipa-i social media nung video aika lemsatep, kong pai osangbener aser pa pusemertem den o jembiba nguogo. Video tem nung paisa yimden yimsüsüba dak sendakba nung puoka alirtem chioktsü ayongzükba den tang administration ya ozüing alema lir ta ashi.

Maduro January 3 nü apuba sülen tatong tir Delcy Rodriguez interim tir kümogo. Lai US den teka amteper inyaksü jenjang agiogo aser linük indang toztü reserve tem international corporation tem nem lapoktsüogo.

Hong Kong media mogul Jimmy Lai küm 20 tepuokdaki yokogo

Hong Kong, Tsüklai/February 9 (Agencies): Hong Kong nung okadakti Beijing indang national security law kübok pro-democracy media tycoon Jimmy Lai küm 20 tepuokdak ayutsü obendang agütsüogo.

Hombarnü iba obendang agütsüba ajanga Hong Kong indang national security ken o tongtibatiba ka tembangdaksüogo, koba küm pongu tashi atsür aruogo.

Lai ya tangbo shibangtsür aliba Apple Daily newspaper ngutetsang lir. Pa mezüng 2020 küm August ita apu aser taoba küm tatemlen ken o ana nung aitsüogo. Pa ya bendanger den longjemer inyakba aser linük anema o cettem publish asüba atema aitsüogo.

Hong Kong nung iba okakda yagi ashiba agi, bendanger den longjemer inyaksü asoshi asatetertem rongnung Lai ya tongtiba liasü, aser ibayongji pa nem temerenshi tali agütsüogo.

Arishi küm 78 tain shiba United Kingdom lisopur ka lir, pai pa aitsüba magizük aser okadak ashiba agi pa ya yimden yimsüsüba dak sendakba nung tepuoker ka aser Beijing-i pa reshikangshir.

Pa tambur kümer asünung tang küm 20 atema tepuokdak ayutsü obendang agütsüba tetezü pa taküm tepeyong tepuokdak alitsü akok.

Lai'er kibong, okatsür, pa pusemer aser taoba mapang pa den külemi inyakertemi pa tepuokdak dang asütsü akok,

kechiyong pa temulungjang meshidak aser high blood pressure lir, ta ashi.

Lai den külemi ano taoba mapang Apple Daily staff tejen trok aser activist ka aser paralegal ka ta tepuokdak ayutsü obendang agütsüogo.

Pa indang co-defendant tem küm trok, ita asem aser küm ter tashi tepuokdak ayutsü obendang agütsüogo.

Aija aliba osangbenertem rongnung publisher Cheung Kim-hung, associate publisher Chan Pui-man, editor-in-chief Ryan Law, executive editor-in-chief Lam Man-chung, English news Fung Wai-kong executive editor-in-chief aser editorial writer Yeung Ching-kee nunger densema lir.

Küm 37 sülen Annual Air Force Meet nung Khamenei shilem magi

Tehran, Tsüklai/February 09 (Agencies): Küm 37 nung tang mezüngbuba Iran indang Supreme Leader Ayatollah Ali Khamenei-i küm shia February 8 nü air force commanders den ajurutepba nung shilem magi, koba pa 1989 küm Iran yimli nung tekolakba kumer küm shia munga aruba sentong ka lir.

Iran aser United States tsüingta tensa mejungi aliba mapang ka nung pai iba sentong nung shilem magi, aser iba ya ajanga US mitkari amaktsü tetsübo nung Tehran-i mera agitsü aliba takzütepda tsür.

Küm shia iba sentong ya Islamic Republic sülen tashi angaa anodakba temaitsü ka lir aser küm 40 jungnüa Iran mitkar

indang calendar nung fixture ka ama aru. Ajisüaka taküm Khamenei maden. Pa melen Armed Forces Chief of Staff Abdolrahim Mousavi-i air force tanishirtem ajurua liasü.

Iba sentong nung Khamenei shilem magitsü telemtetba agiba ajanga geopolitical tsütsü temulung tali agütsür. US-i amaknungbo region nung rara tulu tenzüktsü ta Iran leniri tekum dangtsü aiben shia aru.

Küm aika Iran-i region nung rara balala nung shilem agiba aser proxy wars mapang Khamenei-i ketdangsüa linük nung tatem bangba telemtetba agirji pa lir ta jangjadaktsü. Anungji sentong ka ama saka yimdenren tsütsü tongtipang sentong ka nung pa madenba

ajanga terepranger temi temulung agütsür.

Iba ya kanga asameyanga mera agiba lir aser Iran leniri yimya ka ama tashi sayutsü melen atsüanem akaba nung temulung agütsüba sayur, ta aikati ashir.

Tang tesüsa Oman nung Iran aser United States tsüingta nuclear ken o jembiba sülen iba ya ataloker, koba Iran ketdangsür temi junga tenzükogo ta ashir. Ajisüaka Tehran indang missile sentong aser region nung tasa balala mechi linük ana tsüingta tebilemba balala lir. Ajisüaka Iran-i nuclear enrichment mapa maneni inyaksü aser bendanger tashi kecha agia menok dangtsü ta ashir.

TENÜNGSANG AGÜTSÜR



Dr Sentitula IFS-i Secretariat, North Eastern Council (NEC), Shillong nung Director (Tourism & Industries) jenjang tongtetba atema Chuchuyimlang Senso Mungdang aser Chuchuyimlang Village Council ajanga tenüngsang agütsür. Lai iba ama jenjang tulu tongteta Chuchuyimlang sensosanger nem konang tulu bener arutsüogo. Dr Sentitula-i state kübok tesem balala nung nübur tenzükba mapa alakteta inyaka, talisa yimdak-yimtsüing nung aliba nüburtem jenjang tajungba kumdaktsütsü asoshi bendanga agütsür inyaka aru. Lai maneni Northeast nung aliba nüburtem tenzükba nunga tajungtiba agi inyaksü la dak tamang akar. Northeast nübur tenzükba wadang nung la nem shisatsü tajung moajang ta Tulusang Tsüngrem dang sarasademtsür. Lai iba mapa inyakdang takokba lidakjang ta onoki moatsür.

Netanyahu-i US nung Trump den ajurutepa Iran indang jembitsü

Tel Aviv, Tsüklai/February 09 (Agencies): Israel Ato Kilonser Benjamin Netanyahu ya Donald Trump ajurutsü atema United States-i aotsü, kechiaser US tiri hopta tatemlen Oman nung tsükchir ana tsüingta jembishinü akaba sülen ano Iran den 'follow-on discussions' akatsü sentong metetdaksü, ta Netanyahu indang office ajanga ashi.

Tena ajurutepba mapang US-i tang Iran den jembishinü akaba indanga jembitsü, ta Israel Prime Minister's Office (PMO) ajanga Hombarnü ashi, kechiaser Tehran ya ballistic missile nung tazüokba lidaktsütsüla aser Hamas aser Hezbollah ama region nung telok balala yariba anendaktsütsüla ta Netanyahu tangatetba lir.

Taoba küm Trump tir akumba sülen Netanyahu tena tsüingta ibai senten tenet buba alitsü.

Iran Foreign Minister Abbas Araghchi-i nuclear ken o nung rangloker jembishinü akatsü saka missile sentong indang masü ta ashir.

Deobarnü Iran Tir Masoud Pezeshkian-i Oman nung Hokulbarnü nisung kar ajanga jembishinü akaba ya tejakleni aoba mera ka lir aser par administration-i jembishinü akatsü mulunga lir ta ashi.

"Nuclear ken o nung ozüi kuli agütsüba ya Non-Proliferation Treaty nung temeden agüja aliba nung amendaka lir. Iran linüki teti akumtsübo nem akumtsübo telangzüba agüja lir, saka tashiyim o jembiba magizük tettsü," ta Pezeshkian-i X nung Deobarnü zülua liasü.

Iran ketdangsür temi nuclear ken o kisüing jembitsü mulunga aliba lemsatepogo, saka region nung US mitkar adenshiba magizüker.

Israel aser US ya Iran

anemer linük süaka ken o jembishinüba nung Israel tangatetba balaka lir, koba Trump-i tan hopta ano jembishinütsü ta ashir.

US tiri Oman nung Hokulbarnü tembangba tesüsa jembishinü kanga junger liasü aser Iran-i tezüngzüktep ka kangasa aginer amai ajiteter, ta ashi. "Parnoki tezüngzüktep ka meyanglura, timtem tulu asütsü," ta Trump-i ashi.

June ita Israel aser Iran tsüingta anogo 12 raraba mapang shilem agiba sülen Trump-i Iran anema mitkar amshitsü amokmerener hopta ishika lir US aser Iran tsüingta jembishinü akar.

Israel-i region nung Iran ya azüingmeyaka yutsütsü meranger, aser iba rara nung Tel Aviv-i Iran mitkar aser nuclear aliba tesemtem maka nuclear scientist takotet kar aser mitkar tanishirtem tepseta liasü. US-ia Iran indang Natanz, Fordow aser Isfahan nuclear facilities maka liasü. Iran-i tayang kepzüka Israel yimtitem aser region nung US-i temulung agüja aliba tesemtem nung ballistic missiles noklang aika khaloktsü.

Trump-i ano Iran amaknungbo kanga agi tamajungba asütsü ta amokmeren aser Middle East nung aircraft carrier aser warships tem yoka liasü.

Alima nung tashi tulu aliba linüktem aser region nung linük balalai US aser Iran tsüingta jembishinü akaba raksara toztü adokba region ajunga nung rara prokshia aotsü tsübor. Saudi Arabia, Qatar aser Oman ama gulf linük temi kanga meranga yimjung asoshi inyakteper.

Iran Foreign Minister Araghchi-i US den jembishinü akaba junga tenzükogo saka tamang kaketsü ano mapang talangka lir ta ashi.

11buba Morning Premier League tenzükogo



Dimapur, Tsüklai/February 9 (TYO): 11buba Morning Premier League (MPL) 2026 February 9 nü I.G. Stadium, Kohima nung formally tenzükogo.

Asayamung lapokba sentong nung Director of the Department of Youth Resources and Sports (DYRS), Kethosituo Sekhose tongti tejaoker liasü. Sentong nung o jembiba mapang Sekhose-i ashiba agi, nüburtem longjemdaksütsü aser asaya ajanga lokti tensendaktep akangshidaksütsü asoshi iba asayamung yagi tongtibang shilem agir ta ashi.

Küm 10 dak tema iba asayamung takok ngua ayongzüka asayaba atema Morning Football Association

(MFA) nem tenünsang agüja pai, küm 11 tashi iba asayamung mesamadaksüi ayongzüka asaya aruba atema asayamung ayongertem nem tenünsang agütsü. Grassroot nung terenlok koda tongtibang iba indang jembiba mapang Sekhose-i Dr. T. Ao Junior Girls National Football Tournament indang lemsatep aser state nung league-based tetoktepa tem tali ayongzüka asayatsü nüngdakba lemsatepa liasü.

Maneni paisa, sports administration nung taoba mapang asaya alirtem nem shilem agidaksütsü koda tongtibang iba indang lemsatep aser ashiba agi, item nisungtemi shilem agiba ya sorkar indang sports policy aser Sports

Governance Act provision tem den tapet lir.

Kasa mapang nung Col. Krishna Mishra, Commandant, 45 Assam Rifles iba sentong nung alakteta jaoker liasü. Sentong ya Assistant General Secretary, MFA Thanpenlo lenisüba nung agi. Sentong nung Associate Pastor, KABA Lipoknungsang-i sarasadem aser MFA tir Burakum-i lokti pela agizükba o jembiba liasü.

Sentong nungsa Azi Rudy-i ken tajung ka aten aser General Secretary, MFA Moamar-i tepela o jembiba liasü.

Asayamung mezüngbuba asaya nung Vanguard FC Old Boys-i goal 2-1 agi Gethemgo FC koka liasü.

Davis Cup: India-i 3-2 agi Netherlands kokogo

Tsüklai/February 9, 2026 (Agencies): Netherlands den Davis Cup asaya nung India nung arishi küm 25 tain asayar Dhakshineswar Suresh-i asaya pongububa koka parnoki asaya 3-2 agi kokogo aser Qualifiers Round 2-i iogo.

Netherlands den kanga junga asayaba ajanga Suresh kanga kara renloka aoba sayur.

Arishi küm 25 tain asaya shiba dang DK ta ajar pa ya tang agi tanabenbuba-ang Davis Cup asayar lir aser pai kija asaya aser Yuki Bhambri den tarep asaya-a kokogo.

Iba asaya akokba ajanga 2004 küm Leander Paes-i Japan den asayaba mapang kija asaya ana aser tarep asaya ka ta asaya asem

akokba bilemtetshidaksüogo. Küm 20 shi lir Dhakshineswar shiba tang world rankings nung jenjang 465 nung lir, pai Paes mesüka asayaago. Deciding asaya nung pai pressure kanga junga agiteta Guy de Ouden 6-4, 7-6 (4) agi koka liasü.

Netherlands team nung kija asayar world number 29 Tallon Griekspoor aser world number 67 Botic van de Zandschulp na maliasü aser iba ajanga India team (rank 33) nem world number six team akoktsü asoshi maongka agüja liasü.

Tang mezüngbuba India team Davis Cup format tasenba nung Qualifiers tanabuba round tongtetogo.

Team anaprongla asaya kaka koker anogo tenzükba sülen Yuki Bhambri aser Dhakshineswar nati 7-6(0), 3-6, 7-6 (1) agi David Pel aser Sander Arends na koka India team 2-1 agi tejakdang aküm.

Iba sülen kija asaya nung Sumit Nagal-i 7-5, 1-6, 4-6 agi world number 88 Jesper de Jong makok. Nagal asoshi iba asaya makokba ya kija asaya tanabuba makokba liasü.

Ajisüaka captain Rohit Rajpal-i tatembangbuba asaya D h a k s h i n e s w a r asayadaksütsü shim aser pa dak temulung lemtea shimba ama Dhakshineswar-i kanga junga asaya-a De Ouden akok aser India team takok dangi ania liasü.

Asian C'ships: Manu aser Esha nati silver aser bronze medal angu

Tsüklai/February 9, 2026 (Agencies): New Delhi nung tang asaya aliba Asian Championship nung Hombarnü tetsür 25m sports pistol asaya nung Olympic nung medal ana tashi ngur alila Manu Bhaker-i tatem tashi kanga meranga asaya saka gold monguteti silver medal dang ngua liasü.

Dr. Karni Singh Shooting Range nung final asaya nung shoot-off ka asayaba sülen lai

Vietnam tsür Nguyen Thuy Trang tera agi makok.

Bhaker aser Nguyen Thuy Trang napronglai final asaya tatembanglen mebandangteti kanga junga asaya aser tenapronglai poing 35 ngua liasü. Main scoreboard nung takoker mebandangtetba sülen tena tie-breaker ka asaya. Tie-breaker nung Thuy Trang-i point ka talila nguteta lia iba asaya nung gold medal ngua liasü.

Bhaker-i maneni tongtibang asayamung ka nung kanga junga asayaago, saka gold aser silver na tsünga shoot ka dang tebandang liasü.

Kasa asaya nung Esha Singh-ia kanga junga asaya-a lai point 30 angu aser bronze medal ngua liasü.

Tetsür ti asayaba final nung India tsür Rhythm Sangwan-a densema liasü, saka lai point 27 dang ngua pezübuba nung tembang.

NAA-i ayongzüka NTPC City Open asayamung asayatsü

Dimapur, Tsüklai/February 9 (TYO): Nagaland Archery Association-i ayongzüka February 21 nü Indira Gandhi Stadium, Kohima Archery Ground nung Khelo India - NTPC City Open Tournament ayongzüka asayatsü ta, sangdong ka ajanga metetdaksüogo.

Iba asayamung ayongzüka asayatsü atema Archery Association of India-i State Association nem temelaba agütsüogo.

Iba asayamung ya anogo ka dang asayatsü aser association-i archer ajak dang iba asayamung nung asayatsü ajungshiba den pelashishia jaokogo.

Asayamung nung category temji Indian Round, Compound aser Recurve asütsü.

Archer ajak dang iba asayamung atema züngoksemtsü aser tenüngdakba osangtem agütsü atema pai District Archery Associations den tongteprateptsü asoshi mepeshia metetdaksüogo.

Association-isa asayamung nung takok angurtem dak alia Archer ajak nem asayamung nung shilem agiba atema kuli kaket agütsütsü, ta Nagaland Archery Association Secretary Asalie Peseyie-i metetdaksü.

T20 World Cup: Scotland aser Zimbabwe nati takok angu

Tsüklai/February 9, 2026 (Agencies): India aser Sri Lanka na nung tang asaya aliba T20 World Cup nung Hombarnü Scotland-i run 73 agi tang World Cup nung mezüngbuba asayaba Italy team kokogo.

Asaya nung Munsey-i Scotland atema ball 54 nung run 84 yanglua par team-i ajak senteper run 207 yangluba nung tongtibang shilem agi. Parnok rongnungisa Leask-ia tatembangbuba ball pongu nung run 22 yanglua team jenjang kanga junga kümdaksü.

Bowling aonba mapanga Leask-i kanga junga asaya-a pai mezüngbuba ball nung asayar ka out sütsü aser pai run 17 agütsür wicket 4 agia liasü. Iba asaya nung Italy team-i over 16.4 nung run 134 dang yangluteta asaya makok. Asaya nung tia maka Italy

captain Wayne Madsen tapu loktetba sülen batting mementet.

Tanga asaya ka nung Zimbabwe-i wicket ti agi Oman kokogo. Toss akokba sülen Zimbabwe-i mezüng bat asütsü shim aser fast bowler temi yakta dang asaya azüoka asaya-a Blessing Muzarabani aser Richard Ngarava nati mapang tatsüka tsünga Oman nem run 27 dang yangludaksür asayar pontu out sütsü.

Oman team-i asayar ajak out ser run 103 dang yangluteta liasü.

Asaya akoktsü atema run 104 nüngdaka tanabuba innings tenzükba sülen Zimbabwe nungi asayar Bennett-i ball 36 nung run 48 yanglu aser Taylor-ia run 31 yanglua team takok dangi ani. Parnoki over 13 nung dang asaya kokatok.

INDIA OSANG :

Tapak 3 nungi...

Wangchuk temang kanga junga lir

Justice Varale-i Nataraj dang, "Timtem kar lir, aser nai-a 'nunga' ta mashir aser pai-a pa temang mejungi aliba metetdaksür. Doctor-ia hau ta ashir aser tang treatment agütsür. Atangji pa temang mejungi lir aser taoba mapang nunga onoki iba tebilembaji benoka liasü," ta metetdaksü.

ASG Nataraj-i, "Tang tashi nungbo health dak sendakba nung pa temang junga lir. Treatment agütsü atema Ladakh dang nungibo Jaipur tesem tajungba. Rajasthan nung AIIMS lir saka Ladakh nungbo kecha mali," ta ashi. Ibaji langzüa Justice Varale-

i, "Masü, nai ibaji ashütsü makok," ta ashi.

Tesüsa Nataraj-i bench dang maneni asüng ken o angadangtsü mepishi.

February 4-i Supreme Court-i Centre dang, Wangchuk temang mejungi aliba nung ajemdaker sorkari pa chioktsü atema takoktsü lenmang ali asü, ta metetdakja liasü.

Yaküm Leh nung Ladakh atema Sixth Schedule atema takhangba agüja longkak aيتدang nisung ana asü aser aika yirua liasü, iba sülen September 26 nü Wangchuk apu.

BILEMDANGANG

"Tsüngrem dak tamang katetra tamakoktsü ajak koktetyonga aotsü."